

# INUIT ATAQATIGIIT

## INATSISARTUNI



15.februar 2016

UPA 2016/42

Inatsisartut suleriasianni § 33 naapertorlugu aaliangigassatut siunnersuut imaattoq matu-muuna saqqummiuppara:

**Sanaartugassanut aningaasaliissutissani 2017-mi 2018-milu Aasianni Kulturikkut illorsualiassamat katillugu 15 mio.kr.-nik nunatta karsia aningaasaleeqataasinnaanersoq misissoqqullugu Naalackersuisut peqquneqarnissaanik inatsisartut aaliangiiffigissaattut siunnersuut.**

(Inatsisartunut ilaasortaqaq Peter Olsen, Inuit Ataqatigiit)

### **Tunggavilersuut:**

Illoqarfik Aasiaat qujanartumik inukilliartorunnaarluni ukiuni kingullerni inuttusiartoqqilersimavoq.

Naluneqanngitsut Avannaani Ilinniarnertuunngorniarmiup 1983-mili Aasiannut inissinneqarsimanerata kinguneratigut ilinniarnertuunngorniariartorlutik inuusuttorpassuit Aasiannukartalersimapput. Naluneqanngitsutullu ilinniarnertuunngorniarmik ukiormanna aamma allisarneqareerluni nutarterneqareerlunilu naammassereersimalerpoq, taassuma saniatigut ilinniartut angerlarsimaffii nutaarsuit aamma sanaartorneqarsimalereerlutik. Aasiaat ilinniartoqarfissuunngorsimalereerput.

Taassuma saniatigut Aasianni inuussutissarsiornequt periarfissat ukiuni kingullerni aatsaat taama pitsaatigilersimapput; Naluneqanngitsut Aasiaat aamma tassaavoq avannaani umiarsuliveqarnikkut qitiusumik inissisimasoq, amutsiveqarluni ingerlalluurtumik taassumalu saniatigut aalisakkeriveqarluni ingerlalluurtumik ulloq unnuarlu inuppassuarnik suliffissaqartitsisumik.

Inuussutissarsiornerup ingerlalluurtup saniatigut naluneqanngitsut Aasiaat aamma tassaapput kulturikkut, taalliornikkut nipilersornikkullu nunatsinni ineriartortitsiviullutillu, pikialaartitsiviullutillu maligassiuisut ilaat.

Nipilersornikkut taalliornikkut erinniarnikkullu nunatsinnut erniulluurtut, pisuussutittalu annersaasa ilaat Aasianniit aallaaveqarput, ilaatigut makkuusut: Ado Lyngé, Tikaap pingasuusartui, Maasi Lyngé (Piitsukkut) Inneruulat, Sarfaq, Qinngornerit, minnerunngitsumillu Ole Kristiansen.

Minnerunngitsumik nunatsinni appisimaartitsisarfiit annersaat tassalu Nipiaa Rockfestival aamma ilaqutariinnut aqqissuuttakkat soorlu Mini Aqpiq Jam aamma Mini Rockmik taaguuserneqarsimasut ukiuni kingullerni 15-ni ingerlanneqartareersimasut Aasiaat illoqarfittut nunatsinni nunattallu avataani tusaamasaassutigillualersimasaasa ilagilluinnarpaat.

Ilaatigut tamakkorpiaat tunggavigalugit Qaasuitsup Kommuneata 2014-mi kulturikkut illorsuassap titartarneqarnissaanut aningaasaliissutissat 200.000.kr 2015-mi aningaasaliissutigissallugit akuersissutigisimavai.

2015 naalersoq titartaasitsineq naammassivoq, tassuunakkullu takuneqarsinnaanngorpoq illorsuassaq sananeqaruni qanoq akeqarumaaassanersoq. Siunertaavorlu aningaasaliissarsiornersamat ukioq manna 2016 atorneqassasoq. Aasiannilu kulturikkut illorsuartaarnissaa siunertaralugu suleqatigiiffimmik pilersitsisoqarpoq. Suleqatigiillu taakkua tassa suliaasarilerpaat ukioq manna aningaasaliissarsiornermut atussallugu.

Kulturikkut illorsualiassap sanaartorneqarnisaa katillugu 52 mio.kr-it missaannik akeqassanganneqarpoq.

Takorloorneqarpoq Qaasuitsup Kommunea aamma Namminersorlutik Oqartussat sanaartorneranut aningaasaleeqataatinneqassasut, taassumalu saniatigut aningaasaateqarfiit assigiinngitsut saaffigineqassallutik, ilaatigut soorlu lokale og anlægsfonden, mærsk fond allarpassuillu.

Takorloorneqarpoq Qaasuitsup Kommunea aamma Namminersorlutik tamarmik immikkut 15 mio.kr-nik assigiimmik aningaasaleeqataatinneqassasut, sinnerilu 22 mio.kr missaaniittut aningaasaateqarfinniit pissarsiarineqassasut.

Aningaasaateqarfiit aningaasaleeqataanissaannut pilerisulersissagutsigit taamaammat pisortat aningaasaleeqataajumallutik neriorsuuteqarnissaat pingaaruteqartorujussuuvoq.

Taamaattumik aningaasaliisussarsiornissap iluatsilluarneqarnissaa siunertaralugu matumuuna siunnersuutigaara naalakkersuisut aningaasaleeqataanissamik neriorsuuteqarnissaannik peqquneqassasut, neriuppungalu siunnersuutiga tigulluarneqarumaartoq.

### **Pisortanut aningaasatigut allaffissornikkullu kingunerisassat.**

Allaffissornikkut annerusumik kinguneqassanngilaq, taamaattumillu immikkut aningaasaliissuteqaqqinngikkaluarluni ingerlanneqarsinnaalluni. Kulturikkut illorsualiassaq namminersorlutik oqartussaniit aningaasaliiffigineqassaguni tamanna 2017-mi 7,5 mio.kr-nik aammalu 2018-mi 7,5 mio.kr.-nik, katillugu 15 mio.kr.-nik nunatta karsianut kinguneqarnissaa ilimagisariaqarpoq.

### **Namminersorluni inuussutissarsiuteqarnermut aningaasatigut allaffissornikkullu kingunerisassat.**

Namminersorlutik sanaartortitsisut aningaasaqarniarnerannut aammalu suliffissaqartitsiniarnermut pitsaasumik kinguneqassaaq. Allaffissornikkut kingunerisinnaaneranik soqanngilaq.

### **Innuttaasunut aningaasatigut allaffissornikkullu kingunerisassat.**

Innuttaasunut suliffissaqartitsiniarnikkut pitsaasumik kinguneqassaaq.

Taamatut oqaasertalerlugu matumuuna siunnersuutiga ingerlateqqippara.

Qujanaq

In.in.

Peter Olsen  
Inuit Ataqtigiit